



Minggu, 08 Januari 2023
Ogen : Kuan-kuanen 10:28



Perulihen Kalak Bujur Ras Jahat



Enggo sada minggu si dalani tahun 2023 ndai, si benaken me ndalanken kerna rancangan entah program-program si enggo si susun (baik si tertulis, bage pe si enggo irancang bas pusuhta). Bas perdalanenna banci jadi lit si jumpai tantangan si banci erbahanca kita surut. Entah paksa enda perdalanenta erdalan alu mehuli (mulus) bagi bas dalam tol bebas tantangan. Kune kuga gia paksa enda, kitab kuan-kuanen mulihi mereken kata penjemba. "Pengarapen kalak bujur kempak keriahen kap perlawesna, pengarapen kalak jahat tetap sia-sia." Kalak bujur e me kalak si malang man Dibata. Bas kalak bujur lit lalap si mehuli, lit keriahen i je e maka lalap lit semangat si mbaru, perukuren-perukuren si mbaru i bas sa. Bas pusuh kalak bujur lit lalap arapen, janah arapen e maba keriahen sabap kebujuren me si ipelebe. Enda me ikataken sikap optimis. Kalak optimis tek maka lit si mehuli bas kerina si jadi i bas geluhna.

"Seorang optimis tetap terjaga sampai tengah malam untuk melihat tahun baru masuk. Seorang pesimis tetap terjaga untuk memastikan tahun yang lama berlalu" (Bill Vaughn). Kalak optimis mesikel kel ia guna ngidah, ngenanami dingen ngejapken kerna suasana si mbaru bas kegeluhenna. Bas perukuren kalak bujur lalap rusaha uga gelah mehuli, lit keriahen, kemalemen ate bage pe ketenengen bas kegeluhen. Lebih asa si e rusah ngubah si sea-sea akap kalak jadi si erguna bas kegeluhen. Petembil ras kalak jahat si mabai geluh ku bas si sea-sea. Ulihna labo mereken kiniulin man diri bage pe man sekelewet.

Kita kap nande, nande si bujur. Mari babai dirinta ras se isi jabuta gelah tetap optimis bas ndalani geluh enda seh maka ulihna pe ngerehken kiniulin. Isilah wari-warinta alu kerina si mehuli.